

VENDIM
Nr. 83, datë 20.2.2019

**PËR DHËNIEN E LEJES PËR HAPJEN E INSTITUCIONIT ARSIMOR PRIVAT,
PARAUNIVERSITAR, “SHKOLLA FINLANDEZE”, TIRANË**

Në mbështetje të nenit 100 të Kushtetutës dhe të nenit 42, të ligjit nr. 69/2012, “Për sistemin arsimor parauniversitar në Republikën e Shqipërisë”, të ndryshuar, me propozimin e ministrit të Arsimit, Sportit dhe Rinisë, Këshilli i Ministrave

VENDOSI:

1. Dhënie e lejes për hapjen e institucionit arsimor privat, parauniversitar, “Shkolla Finlandeze”, Tiranë, shoqërisë “Kolegji Independent”, sh.p.k.

2. Institucioni arsimor privat, parauniversitar, “Shkolla Finlandeze”, Tiranë, do të ushtrojë veprimtarinë arsimore në adresën: Linzë, km 8, Tiranë.

3. Në institucionin arsimor privat, parauniversitar, “Shkolla Finlandeze”, Tiranë, mësimi do të zhvillohet në gjuhë të huaj (në gjuhën angleze). Në lëndët si gjuhë shqipe, letërsi shqipe, historia e kombit shqiptar dhe gjeografia e Shqipërisë, mësimi do të zhvillohet, detyrimisht, në gjuhën shqipe.

4. Institucioni arsimor privat, parauniversitar, “Shkolla Finlandeze”, Tiranë, do të ofrojë arsimim parauniversitar në nivelet:

- a) arsim parashkollor;
- b) arsim bazë.

5. Forma e arsimimit në institucionin arsimor privat, parauniversitar, “Shkolla Finlandeze”, Tiranë, do të jetë arsimim me kohë të plotë.

6. Institucioni arsimor privat, parauniversitar, “Shkolla Finlandeze”, Tiranë, me fillimin dhe gjatë ushtrimit të veprimtarisë së tij do të paraqesë në njësinë arsimore vendore, brenda afateve të përcaktuara, informacion për:

a) numrin e fëmijëve të kopshtit, numrin e nxënësve dhe listën e mësuesve të regjistruar, që do të fillojnë dhe do të mbarojnë vitin shkollor, sipas udhëzimeve të Ministrisë së Arsimit, Sportit dhe Rinisë dhe statistikave të miratuara nga INSTAT-i;

b) planin mësimor, programet lëndore;

c) strukturën që do të ketë institucioni në fillim të çdo viti shkollor, e cila duhet të jetë e barasvlershme me atë të shkollave publike të të njëjtit nivel, së bashku me kalendarin e veprimtarive vjetore të institucionit;

ç) aktin e regjistrimit në organin tatimor;

d) lëndët mësimore të detyrueshme, njëloj me ato të shkollave publike;

dh) listën e veprimtarive jashtëshkollore, që parashikohen të zhvillohen gjatë vitit shkollor;

e) adresën e institucionit, adresën elektronike (e-mail) dhe numrin e telefonit.

7. Institucioni arsimor privat, parauniversitar, “Shkolla Finlandeze”, Tiranë, duhet të miratojë në Ministrinë e Arsimit, Sportit dhe Rinisë çdo ndryshim në planin mësimor, programet e lëndëve apo tekstet që do të përdorë, si dhe çdo projekt apo eksperimentim psiko-pedagogjiko-didaktik që kërkon të kryejë, sipas rastit.

8. Ndryshimet që mund të pësojë institucioni arsimor privat, i licencuar, në vendndodhjen dhe infrastrukturën e godinës shqyrtohen dhe miratohen në Ministrinë e Arsimit, Sportit dhe Rinisë, pas miratimit të njësisë arsimore vendore, 3 (tre) muaj para fillimit të vitit shkollor përkatës.

9. Institucioni arsimor privat, parauniversitar, “Shkolla Finlandeze”, Tiranë, duhet të ketë në ruajtje dokumentacionin, si më poshtë vijon:

a) Dokumentacionin themeltar në ruajtje të përhershme, si: regjistër amze, indeks alfabetik, regjistër të

veçantë, statistika vjetore të numrit të nxënësve dhe të mësuesve;

b) Regjistra të përkohshëm, si: regjistra klase, evidenca për lëvizjen e nxënësve (të detyrueshme për institucionin arsimor privat parauniversitar);

c) Rregulloren e brendshme për funksionimin e institucionit;

ç) Kriteret për pranimin e nxënësve dhe të mësuesve;

d) Kontratat me prindërit për shërbimet arsimore apo shërbime të tjera, jashtëshkollore, që ofron;

dh) Kontratat e punës me mësuesit (për ata me kohë të plotë apo të pjesshme).

10. Dokumentacioni i paraqitur në pikat 6 e 9, në rast monitorimi dhe inspektimi, u vihet në dispozicion strukturave kompetente mbikëqyrëse.

11. Moszbatimi apo mosrespektimi i këtyre detyrimeve si dhe mosdhënia apo fshehja e informacioneve nga strukturat kompetente mbikëqyrëse e inspektuese, të cilat do të verifikojnë apo do të kontrollojnë funksionimin dhe mbarëvajtjen e këtij institucioni arsimor, përbën kundërvajtje administrative dhe sanksionohet sipas akteve ligjore e nënligjore në fuqi.

12. Në rast se institucioni arsimor privat nuk hapet gjatë dy viteve shkollore të njëpasnjëshme, nga momenti i hyrjes në fuqi të këtij vendimi, subjekti e humbet të drejtën e hapjes së institucionit.

13. Ngarkohen Ministria e Arsimit, Sportit dhe Rinisë, njësia arsimore vendore dhe institucioni arsimor privat, parauniversitar, “Shkolla Finlandeze”, Tiranë, për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI

Edi Rama